



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim


tiryimyim@aolima

tir yimyim

TAPAK 8



PM Modi leniba nung ketdangsertemi J&K tensa asadang



AC Milan coach mapa inyaksü Paulo Fonseca shimogo

VOL. XXI ISSUE NO. 242 (ADOK 242) DIMAPUR

ROGONÜ (FRIDAY) AAMI (JUNE) 14, 2024

₹ 5.00

Nagaland Police-i temesepba chiyongtsü anema maneni rarar

Dimapur, Aami/June 13 (TYO): State tesem ajungalen synthetic drugs aser psychotropic substances aser IMFL (Indian Made Foreign Liquor) talubosa anguba aser item temesepba chiyongtsü ajanga lanurtem takum raksatsüba tebilemtsü azüoktsü mechi Nagaland Police-i maneni district ajunga nung State-wide Operations agir, ta sangdong ka ajanga ashi.

Iba amala ozüing alema maparen inyakba nungi nokdangtsü mechi gari tem meita aoba (MVCP), hotels, restaurants amala meita aoba aser bushisüngdangba maparen tenzükogo.

Yamaji inyaka arudang May 16 nungi 31, 2024 tsüingta Brown sugar grams 466.92 aser Heroin grams 57 nguteta nisung

21 apu aser ken o 9 benoka lir. Maneni iba mapang IMFL tejang 4740 nguteta nisung trok apu aser ken o 7 benoka liasü. Kasa mapang .22 rifle ka den injang trok aser magazine ka nguteta nisung ka apu aser ken o ka benoka liasü, ta sangdong ajanga ashi.

Maneni Nagaland Police ajanga nüburtem dang Narcotics/ Drugs/IMFL ayokba/alemba osang anasatiba Police Station mesüra Narcotic Police Station nem agütsüsü ayongzükka liasü.

'Call Your Cop' mobile App nung Nagaland Police Officers & Police Stations balala indang CUG (Closed User Group) phone number tem angutsü. Osang agütsür tenüing mesüra ayak/ maitüsü temai madoktsüsü, ta Nagaland Police sangdong ajangasa ashi.

Mon nungi sepaitem anientsü Konyak Union-i akhanger

Dimapur, Aami/June 13 (TYO): ULB election dak sendakba mangatetep Konyak Union ajanga tajunglen nungi angatetteptsü merandang Nagaland sorkar aser Home Department ajanga district-i sepa tali yokba osang angazüker. Iba ama tashiyim yimya ajanga menüingdakba nung nüburtem aoksateper/ mangatetteptsü aser yimjung nung aliba meinpronger, ta Konyak Union ajanga January 13, 2024 nü Nagaland state sorkar dangi züluba shiti ka nung shia liasü.

Iba dak sendakba nung ketdangsur dang Mon district-i sepaitem yokba athitsü aser yoka aliba ghonda 24 tsüingta

anizüker aotsü ajungshir, ta sangdong ajanga ashi.

Onoki akhangba ama meinyakra, tarutsü nung tensa mejungi kumra, item agency/ authority ajanga khuret ajak abentsü, ta Konyak Union ajanga ashi.

Eastern Nagaland nung aliba nüburtemi India sorkar dang Frontier Nagaland meshiba nung Centre nungi telangzüba tajung magütsüba mechi Nagaland kübok Mon, Tuensang, Longleng, Kiphire, Noklak aser Shamator district tem nung aliba nüburtemi tawa agiba Lok Sabha Elections 2024 nung shilem magi aser tang agitsü aliba ULB elections nunga shilem magitsü sangdonga lir.

Medziphema Town Council atema NDPP candidate ka den tokteper mali

Dimapur, Aami/June 13 (TYO): Medziphema Town Council kübok Ward 7 nungi NDPP candidate Seyievino Vitsu den tokteper mali ULB election takok nguogo. Ajisüaka takok anguba kulizüing kaket ya candidate withdrawal atema tatem anogo, June 18, 2024 nü ang agütsüsü.

Menden toku aliba Medziphema Town Council election atema nomination papers scrutiny June 13, 2024 nü agia liasü.

Brehostibarnü Municipal aser Town Council elections atema

scrutiny agiba sülen political party balala nungi candidate 21 indang nomination nung tai aputsü mali ta sangdong.

Nomination paper tem scrutiny asüba maparen ya Election Observer lia inyaka liasü.

Kasa mapang Nagaland Municipal and Town Council election 2024 nung Medziphema Town Council asoshi Election Observer, Limanenla, Joint Secretary ajanga May 13, 2024 nü ADC cum RO Office, Medziphema semdanga ULB election tajungtiba nung agitetsü mechi senden ka mena liasü.

Nüburtem asoshi maneni inyaksü temulungtetba nung lir: NDPP

Dimapur, Aami/June 13 (TYO): Nationalist Democratic Progressive Party (NDPP) aser NDPP Parliamentary Party telungjem senden ka June 12, 2024 nü Kohima nung mena pangzüing kar yanglua liasü.

Tawa tembangba Lok Sabha election nung takok anguba aser kümsük tasembuba atema takok ngua sorkar kumtetba atema teloki tenüingsang agüja liasü.

Ato kilonser aser NDA ajanga küm pongu atema linük anidang tajungtiba nung yimsü asütsü teloki moaja liasü.

House-i ato kilonser aser NDA sorkar dang tajemzükba kin, minorities aser tamangba yimsü ajak kumzükka Constitution of India kübok secularism lidaktsüsü aser ajak asoshi sako inyaksü ayongzükka liasü.

House-i Lok Sabha elections nung Nagaland nung aliba nüburtem mandate akumtsüboa agizüker ta ashi. Iba tajangshiba ya ajemalushiba mapang ka lir aser iba mandate ya tila kumshir agizüker aser kasa mapang Member of Parliament (Lok Sabha) S. Supongmeren Jamir

nem tenüingsang agütsür aser dangar makoksatsüsü tangatetba nung Naga nunger aginüba ama inyaksü imlar, ta pangzüing nung shia liasü.

Tawa nüburtem mandate ajanga Party aser Legislator tem ajungmesoa metokmeperi lepa repranga shisadangtsü, aibelen metongshia Party indang constitution, commitments aser manifesto nung aliba ama state nung nüburtem maneni tenzüktsü pangjem.

Takok aser tamakok ajak arok mapa lir aser iba mandate ya party aser Legislator tem arok mapa ta House nung ajaki mulunga agizük.

Election maneni takok ngua yimjung nung agitetba atema House-i Election Commission of India, State Election Commission, Chief Secretary, Director General of Police aser State machinery ajunga, central Paramilitary forces ajak aser Nagaland nung aliba nüburtem nem tenüingsang agütsü.

State nung aliba nüburtem tenzüktsü asoshi aroki mera agiba nung Chief Minister

Neiphu Rio aser Party tir Chingwang Konyak lenisüba nung tamang akar aser maneni nungita yaritsü teloki mulunga pangjem.

State sorkari sorkar sasep nung Political Affairs Committee tentetba aser political party tem sasep nung Political Consultative Committee kumtetsü telemtetba agiba teloki pela agizük. Teloki Indo-Naga Political ken o tekeratiba nung tangatetep kati arutsü asoshi temulung agüja inyaksü House nung pangjemshi aser Party Manifesto nung shia aliba ama tang tejembidak yimten ken o tajungba aser tekeraba nung telemtetba agitsü asoshi yariteptsü aser nüburtem ajak densema aser ajaki agizüktsüsa political settlement atema lenmang bushitsü nenshia renema liasü.

Party indang manifesto aser constitution nung shia alima ama NDPP ajanga nüburtem ajungtsü asoshi maneni nokdaksü aser inyaksü pangjem aser nüburtem dang maneni Urban Local Bodies (ULBs) nung shilem agia sorkar yaritsü ayongzükka liasü.

Health care system nung nurse tem tongtipang tongshi kumogo: C&S Kezo

Kohima, Aami/June 13 (TYO): Trained Nurses' Association of India (TNAI) Nagaland Branch pur küm 50 ajungba jubilee mung June 13, 2024 nü "Honouring the Glorious Past, Celebrating the Golden Present and Envisioning the Promising Future" omen kübok Capital Cultural Hall, Kohima nung munga liasü.

Iba sentong nung tongti tesemdang ka ama jembidang, alima nung health care system tsütsü nursing ya tongtipang tongshi ka kumogo, ta Commissioner & Secretary Health & Family Welfare, V Kezo-i ashi.

Anisüngzük makai nurses temi mapa ajak inyaker aser shirangertem repranga anepalur, ta pai ashi.

Nurse ka akumtsü atema yimya tajung aika nüngdaker, kechiaser parnoki temang, tekolok aser tanüla nung timtema aliba nisungtem anepalur, anungji shiranger tekolok aser tanüla taginüba angatetsüji nurse atema jenjang tulutiba lir, ta Kezo-i ashi.

Northeast states aser Kerala nungi nurses temi nursing profession nung shilem tulu agir aser item region nungi aruba nurses tem tali meimer, kechiaser parnok dak shiranger tenzüktsü taochi aser temeim lir, ta ashi.

Iba atema pai nurses ajunga nem tenüingsang agütsü aser parnok dang technology tajungba kuma melenshiba nung pei sempet-a tajungba kuma melenshitsü ayongzük.

Bendanga agütsüba nurse temi anepalua kongshiba melentsü kecha maka, aser shiranger ka taneptsü angutsü asoshi parnok dak keta lir, ta ashi.

State nungi nurse temi tematiba jenjang tongteta research mapa nunga shilem agia nüburtem ajangzüktsü asoshi shisatsü tasen bener arutsü imlar, ta Kezo-i ashi.

Paisa state nung aliba mozüki mashi nung teyari agitsü atema Chief Minister Health Insurance Scheme ya anisüngzük tulu kumogo ta ashi.

National Vice President, TNAI North East Region, Cheryl Susan Tada-i tajungshi o jembidang, nurses tem dang temeim aser anepaluba yimya mesamadaktsüsü ayongzükka liasü.

Nurse tem ajangzüktsü mechi Nagaland nung Directorate of Nursing ka amenoktsü nüngdaker, ta lai ashi.

Tarur pela agizükba o jembidang, President, TNAI Nagaland Branch, S Tiakala Longkumer-i Jubilee benjongmung ya otsüsüsü

sentong ka kisüing masü saka tesüiba mapang takok angubatem bilemteta tarutsü asoshi renemshia alitsü mapang ka lir ta ashi.

Lai nurse tem dang tasü ita tejakleni aotsü aser Association tashi itdakja ajungkettsü ajungshia liasü.

Iba jubilee benjongmung ajanga pei temulung nung tesüiba konang bilemteta tarutsü mangdang takzüksü imlar, ta lai ashi.

Iba benjongmung omen nung ajemdaker Nursing Superintendent, CIHSR, Prof. A Purnungla Aier-i jembi aser TNAI Mokokchung Unit ajanga iba sentong lapoktsü, School of Nursing Kohima ajanga choreography ka ai aser jubilee choir TNAI Dimapur ajanga ken tena liasü.

Peraciezie Baptist Church indang pastor, Rev. Dr. Kevichalie Metha-i sarasadema iba sentong tenzük aser Kohima Baptist Pastors' Fellowship, vice president Mhonchumo S. Lotha-i nurse tem atema sarasademja liasü.

Iba benjongmung nung sobaliba saya aser benjongmung tembangba sentong Commissioner & Secretary, Art & Culture, Athel O. Lotha-i moaja liasü.

Clean Doyang Mission takok ngua agiogo



Dimapur, Aami/June 13 (TYO): Clean Doyang Mission June 12 nü takok ngua tembangogo. Sentong koba June 7 nü tenzuka liasü, iba ya Doyang reservoir nung jana atsüngdena aliba merektetsü nükjidong nung ayongzüka agiogo.

Mission takok ngua inyakba atema tenüngsang agütsüba mapang Deputy Commissioner Wokha, Ajit Kumar Ranjan, IAS-i, iba mission ya takokba tashi takarating nung inyakogo, kong nübu, machinery balala aser tanga tenüngdakba maparentem achaayangtsü atema EAC Sungro tekolak ser

area task force ka tentetsü aser June 8 nü nungi officially mapa tenzuka liasü, ta ashi.

Deputy Commissioner-isa, Advisor for Agriculture & Chairman DPDB Wokha, Mhathung Yanthan dang pai tsüngtong arua iba tesem semdangba aser Clean Doyang Mission takok ngua tembangtsü atema team ajungmesoba atema kanga pelaba lemsatepa liasü.

Paisa, team balala aser Pangti, Dhillong aser Doyang temeket nung aliba yimtsüngtem, Englan Range Student's Union (ERSU), aser Lotha Student's Union nungi

volunteer tem shirnoki iba merekmeju sentong nung shilem agiogo, parnok dang kanga pelaba lemsatepa liasü. Maneni DC-i, Team Better Dimapur Eco Warriors Nagaland, 7th NAP, DEF aser SDRF nungger danga kanga pelaba lemsatep, shirnoki iba sentong takok ngua tembangba inyakba nung tongibang shilem agia liasü.

Kasa mapang nung DC-i, janatem bendenba tesem nung bendanga processing centre balalai bener yokogo, ta ashi. Paisa, tarutsü nung iba amala tebilemstü nungi jenboa alitsü atema District Administration-i state sorkar den tongtepratepa alitsü aser tebilemstü bentetsü atema shisatsü agitsü, ta shisem.

Rajan-i, Doyang teket nung aliba yimtsüng aser nüburtem dang jana agi tebilemstü adokdaksüba nokdangtsü atema bangzüng kar yanglutsü aser Doyang ayong ya plastic jana nungi kümzüka toktsütsü aser merek mereka tebur junga toktsütsü ajungshia liasü.

Mkg DC-i Dr. Ambedkar Medical Aid Scheme indang metetdaksü

Dimapur, Aami/June 13 (TYO): Deputy Commissioner, Mokochung, Thsuvisie Phojii, Dr. Ambedkar Medical Aid Scheme indang lepareprangshir aliba nükjidong aser inyakyim indang metetdaksüogo.

Dr. Ambedkar Medical Aid Scheme indang nükjidongji, tashidak tulu agi tonger senotsü aika intoka temang anepalutsü nüngdaka aliba Schedule Castes (SC) aser Schedule Tribes (ST) loktitem nungi shirangertem nem senotsü teyari agütsütsü atema lir.

Iba scheme nung tezüng, temulungjang, temesen, tekelok, cancer aser organ transplants aser spinal surgery densema taküm amokmerenba tashidaktem atema surgery agitsü nüngdaka aliba densema lir. Iba scheme agitsü atema kibong kaji küm nung sen 3,00,000/- (Rupees Three Lakhs) dak tali aaba kibong ka masütsüla.

Application benoktsü atema applicant temi prescribe

application form tem Post-Submitting mesüra Dr. Ambedkar Foundation (DAF) website nung agüja aliba prescribed pro-forma indang osang tejangja plain paper nung zülur agütsütsütsü.

Iba scheme atema apply asütsü atema tenüngdakba kuli kakettek bendenba DAF website nung agüja aliba tetuyubatem sülen anidaka application benoktetsü.

Temetetsü kaji inyakyim nung tetsükdaksü kecha matoktsü atema applications ajak tembangba inyaksü aser tenüngdakba kuli kakettek ajak agütsütsü nüngdaker.

Iba scheme ya SC aser ST loktitem atema kanga tongtibang lir aser iba ajanga kanga nüngdaka aliba nüburtem nem teyari agütsütsü. Osang tejangjaba agitsü aser application form download asütsü atema Dr. Ambedkar Foundation's website semdangtsü atema DC-isa metetdaksüogo.

Mangan nung anentsüh alu; ka asü

Gangtok, Aami/June 13 (Agencies): Tzünglu kanga sashia aruba sülen Sikkim kübok Mangan district nung anentsüh agi kongshia nisung ka süogo aser nisung pongu samara bushidar.

District kübok tesem balala nung anentsüh aluba ajanga lenmangtem nokdangogo aser ki raksaba den electricity intongtem raksatsüogo.

Mangan district kübok Pakshap tesem nung nisung ka tasü mang ngutetogo aser Rangrang anasa Ambithang nungi nisung asem aser Pakshap nungi ana samar bushia aliba metetdaksüogo.

Anentsüh agi ki aika kanga mejungi raksatsüogo. Geythang nung anentsüh agi ki asem dak kongshiogo aser Pentok anasa Nampathang nunga ki aser lenmangtem aika raksatsüogo.

Anentsüh agi kongshitsü ana nung aliba ajanga

Bringbong police outpost tanga tesem kati belenerogo aser Sankalan nung apu ka tamendakdak raksatsüogo.

North Sikkim nung mobile network services mejungi kümmer lir.

Iba dak sendakba nung district administration-i, State Disaster Response Force (SDRF) dang tenüngdakba oset balala bener Mangan-i team ka yoktsü mepeshia metetdaksüogo.

Anentsü merektetsü merangdar aser Mangshila Degree College anasa lenmang merektetsü atema earthmover ka yoka lir.

Sikkim chief minister Prem Singh Tamang-Golay, shiba tang BJP leader Pema Khandu tenanzüktepba agiba sentong nung adentsü atema Arunachal Pradesh nung oa lir, pai district ketdangsürtem, police aser department tekolaktem den tongtepratepa arudar.

Longleng Divisional Management Unit senden amen



Dimapur, Aami/June 13 (TYO): Divisional Management Unit (DMU) Longleng lepareprangshiba senden Divisional Forest office complex, Longleng nung June 12 nü menogo.

Senden nung Sitap Range aser Longleng Range nung forestry inyakyim indang osang Deputy Ranger cum FMU Head, Sitap Range, Bedangmongba Ao aser Range Officer cum FMU Head, Longleng, Chepe-ü Koza nati agüja liasü.

Senden nungsa yimtsüng balala nungi Joint Forest Management Committee

(JFMC) tir temi forestry inyakyim aser takok balala angubatam indang aser parnoki ajangshiba tetsükdaksü aser tebilemstütem indang metetdakja liasü.

Maneni senden nung JICA yimtsüng shia nungi Self Help Group lenirtemi Income Generation Activities (IGA) dak sendakba nung parnok inyakyim tem idang metetdaksü, aser FNGO team lenir Sentiyatet-i, maparen balala tejakleni bener oa aliba, SHG jenjang aser training indang metetdakja liasü.

SHG inyakyim aser profiling, JFMC Account, GIS aser MIS, takok angubatam aser

documentation indang Livelihood Expert, Account assistant, Data Entry Operator aser DMU Longleng Documentation Expert nati metetdakja liasü. 2023-2024 küm atema convergence activities report DMU Longleng Convergence Expert-i agüja liasü.

Senden tatemi DFO cum DMU Head Longleng, H. Tokugha Choppy-i, senden nung shilem agirtem dang kanga pelaba lemsatep aser süngtong atemba tajangzük indang lemsatepa liasü. Paisa, süngtolitong agi tajangzük agütsübaji asenoki imlaba dang nungi kanga agi tali ta ashi.

Maneni pai, nüburtem ajangzükdaksütsü atema bendanga agüja inyaksü ta tenanzükba agütsüba den nüburtem dang sorkar teyari dak dang metaloker melei longjemer nendaka inyaksü ajungshia liasü.

Paisa, SHGs tem dang project inyakba mapang bendanga agüja inyaksü ajangshi, kechiyong NFMP, JICA Project ya parnok rongsenketzüng ajangkettsü atema tesayuba agütsütsü asoshi lir, ta shisem. ACF cum ADMU Head Longleng, Ailong Phom lenisüba nung iba senden mena liasü.

Administration-i Assistive aids lemtsü

Dimapur, Aami/June 13 (TYO): District Administration Longleng aser Artificial Limbs Corporation (ALIMCO) na longjemer Rashtriya Vayoshri Yojana (RVY) scheme kübok Longleng town nung aliba beneficiaries tem nem Assistive aids June 13 nü lemtsüogo.

Oset ya category ana küm lemsar agütsüogo: walking stick, elbow crutch, hearing aids, Artificial dentures, tripods/tetrapod's aser wheelchairs, chair den commode, silicon foam cushion, spinal support,

Lumbosacral belt (LS) amala special items tem lemja liasü.

RSY scheme beneficiary tem ya BPL category nung aliba tientet rogo (arishi küm 60 tema) tem atema lir, koba parnok libaliro aser rongsenketzüng ajangkettsü atema lir.

Iba scheme benoka inyakba agency; ALIMCO-i parnoki agütsüba aids & assisted device tem küm ka angati anepalutsütsü. Oset balala lemtsüba sentong ya EAC, Longleng, Vitolu Chishi-i achaayanga agia liasü.

Tuensang nung skill training agütsütsü

Dimapur, Aami/June 13 (TYO): Nagaland Building and Other Construction Workers Welfare Board, Kohima sangdong dak ajemdaker Deputy Commissioner, Tuensang A. Zibenthung Kithan-i, Tuensang District nungi tejangrartem dang 'Skill Proficiency Management for Building and Other Construction Workers' dak sendakba nung hopta ana atema certification course ka asoshi jaokogo.

Iba training ya Tuensang H.Q nung July 16 nungi tenzuka agitsü.

Anungji iba training nung shilem agitsü janrartem parnok indang application den Aadhaar card Xerox copy aser Contact number temonuba agi June 30 nü tashi nungbo DC Office, Tuensang nung agütsütsü metetdaksüogo.

Training ya Electrical, RCC and Brick Masonry stone, tiling aser Plumbing dak sendakba nung agütsütsü. Training nung shilem agitsüpurtem ya arishi küm 18 tema aser arishi küm 60 tekübok asütsüla. Training ya nisung 40 nem dang agütsütsü.

PM Modi leniba nung ketdangsertemi J&K tensa asadang



June 13, 2024 nü New Delhi nung Ato kilonser, Narendra Modi leniba nung Jammu & Kashmir nung security tensa asadanga senden amendang tangokba noksa nung angur.

New Delhi, Aami/June 13 (Agencies): Brihostibarnü New Delhi nung Ato kilonser Narendra Modi leniba nung senden ka mena Jammu & Kashmir nung security tensa asadanga sülen pai ketdangsertem dang kiralongrartem sashia mita aotsü tuyuogo.

Tesüiba anogo pezü tashi Jammu & Kashmir nung kiralongrartemi tesem balala amakba sülen Ato kilonser leniba nung ketdangsertem senden mena iba tensa asadang.

J&K nung security tensa asadanga senden nungji National Security Advisor (NSA), Ajit Doval densema tongti ketdangsertemi J&K Union Territory nung security

dak sendakba osang balala Ato kilonser nem metetdakja liasü. Parnokisa kiralongrartem samatsütsü atema army tem indang asalentong balala Ato kilonser nem tongmelang agi metetdaksü.

Iba sülen Ato kilonser Modi-i kiralongra anema sepai tali lezmüksütsü aser resources ajak amshia kiralongrartem sashia mita aotsü tuyu.

Ato kilonserisa Union Home Minister Amit Shah aser Jammu and Kashmir LG, Manoj Sinha na den-a J&K nung security tensa atema jembio.

Ano tanga osang ka nung, Brihostibarnü National Conference lenir, Omar Abdullah-i, kiralongrartemi Jammu Region amakba sülen

Jammu and Kashmir administration-i nüburtem mashiemashi apur aser amokmerener, ta aitsü.

Taoba mapang J&K Chief Minister, Omar Abdullah-isa, J&K nung kiralongra anendaksüdi süra sorkari nüburtem teyari nungdaksü, ta ashi.

"Nenok ket nung aliba ajak agi hator dang süra nenok matsüngdang ajakji kojala angutsü. Tashimait J&K administration yagi nisung aputsü aser amokmerentsü dang metet. Parnoki maneni kasa aibelen benshir saka tajung adoktsü imlar. Kiralongra anentsü atema nenoki nüburtem teyari nungdaksü," ta pai X ajanga metetdaksü.

Reasi nung bus amakba ken o nung police-i nisung 50 puogo

Srinagar, June 13 (Agencies): Tawa Reasi district nung temeshi ainlen jajartem bus ka nung toudak mapang kiralongrartemi amakba ken o dak sendakba nung Brihostibarnü Jammu and Kashmir Police-i temelung melemteti nisung 50 pua lir.

Iba tatalokba nung tanur ka densema nisung 9 asü aser nisung 50 dak tema yirua liasü.

Police aser security sepaitemi asüngdangyaba ajanga osang karbo nguteta melung melemteti nisung aika puogo, ta police otongdar kati metetdaksü.

"Osang tejangja kar

ngutetba ajanga nisung kar maitsü jangjateta melung melemteti nisung kar puogo. Iba tatalokba jungjunga bushisüngdangtsü asoshi Arnas aser Mahore kübok kanga tezülen aliba tesemtem tashi mita oa liasü," ta otongdarisa metetdaksü.

1995 küm nungi 2005 küm tashi nung item tesem ya kiralongrartem kanga bulua aliba tesemtem liasü, ta paisa metetdaksü.

"Ozüng benokba agency temi item aibelenertem aputsü, aser ibaji ajanga iba area nung alirtem kümzükba den külemi parnok nem

security agütsütsü," ta pai metetdaksü.

Ano külen Brihostibarnü Jammu & Kashmir Police-isa Doda district amaker kiralongrar pezü noksa yanglua prokshio, aser parnok aputsüsa osang tejangja agütsütetertem nem senpet sen lakh 20 agütsütsü, ta sangdongogo.

Intelligence agency temi, kiralongrartemi Rajouri aser Jammu district na kübok Sunderbani, Nowshera, Domana, Lamberi aser Akhnoor tesemtem amaksüa akok, ta tekümdangtsü osang metetdaksüogo.



June 13, 2024 nü Tirumala nung Andhra Pradesh Chief Minister, N Chandrababu Naidu-i Venkateswara tekülem ki sendanga sülen osangbenertem den jembidang tangokba noksa nung angur.

Global Gender Gap Index nung India jenjang 129buba nung lir

New Delhi, June 13 (Agencies): World Economic Forum indang Global Gender Gap index nung India ano jenjang ana agi tamajungba küma jenjang 129buba nung lir aser temaba jenjang nung maneni Iceland lir, ta World Economic Forum (WEF) report ajanga metetdaksü.

Iba report ya Bodhbarnü sangdonga liasü.

South Asia nung aliba linüktem rongnung iba Index nung Bangladesh, Nepal, Sri Lanka aser Bhutan sülen India jenjang pongububa nung lir aser Pakistan tesüsububa nung lir.

Iba Index nung linük 146 rongnungi Sudan tesüsububa jenjang nung lir. Iba Index nung Pakistan-a jenjang asem

agi ano tamajungba küma jenjang 145buba nung lir.

Tang India nung nüsüng crore 140 dak tema lir aser 2024 küm India nung Gender Gap ji shilem 64.1 nung lir. Yaküm India nung jenjang 127buba nung liasü saka takumbo ano jenjang ana tamajungba küma jenjang 129buba nung lir.

India nung iba Index nung jenjang ano tamajungba akümbaji 'Shisaliok anguba' aser 'Yimtenren tsütsü tashi agütsüba' lenla na nung jenjang tera ajemba agi lir. Ano 'rongsenkettzüng tsütsü shilem agiba' aser 'maongka' lenla na nungbo India nung jenjang ano tera tajungba kümogo, ta report nung shia lir.



Kolkata, June 13, 2024: NEET-UG entrance exam result-2024 nung ochimashi anema Kolkata nung AIDSO (All India Democratic Students' Organisation) züngsemtemi longkak aita ayimdenba mapang nung tangokba noksa nung angur.

India-i China-Pakistan külem sangdong aitsür

New Delhi, June 13 (Agencies): Brihostibarnü India-i tang tesüsa China aser Pakistan na külem sangdong ka nung Jammu & Kashmir tetshiba ashishio.

India-i, Jammu & Kashmir Union territory aser Ladakh ya India shilem liasü, tang-a India shilem aser tarutsü nunga India shilemsa asütsü, ta metetdaksü.

June 7 nü China yimtiba, Beijing nung Pakistan Ato kilonser Shehbaz Sharif aser China Ato kilonser Li Qiang na senden amenba sülen linük ana külem sangdong nung J&K tetshia liasü.

India-isa Pakistan aser China na külem sangdong nung China-Pakistan Economic Corridor (CPEC) kübok project balala sangdongba aitsü.

India-i, Pakistan-i ozüng alema India nung litsütem agiba metentsütsü atema inyakba maparen ajakji India-i magizüker, ta metetdaksü.

CPEC ya Pakistan-Occupied-Kashmir ajanga süir.

Brihostibarnü India External Affairs Ministry nung otongdar, Randhir Jaiswal-i, "June 7 nü China aser Pakistan na külem sangdong nung tim mesüi Union territory of Jammu & Kashmir tetshibaji onoki ashishir aser magizüker,"

ta metetdaksü.

Paisa, "Iba onük nung onok tangatetbaji kasa dang lir aser tanga teloktemia ibaji meteta dang lir. Union Territory of Jammu & Kashmir aser Union Territory of Ladakh ya India shilem liasü, India shilem lir aser teti India shilemsa asütsü," ta pai metetdaksü.

Paisa, "Iba onük nung pei tebilemba jembitsü atema linük shinga dak-a temeden mali," ta ashi.

China-Pakistan külem sangdong ajanga, Pakistan-i China nem Jammu & Kashmir indang osang metetdaksü, ta shia lir.

Külem sangdong nungji yamai shia lir, "China-i Jammu and Kashmir mangatetep onük ya akhidang nungi lir aser iba ken o ya UN Charter, UN Security Council indang tapet bangzüng aser linük ana tsüngda tezüngzüktep nung ajemdaker tajungtiba nung latettsüla ta shio." MEA otongdarisa, külem sangdong nung China-Pakistan Economic Corridor (CPEC) kübok project balala sangdongogo aija, project karbo India nung litsü nung lir aser item litsüji Pakistan-i tashiyim amshia atsünga agiba lir, ta metetdaksü.



TIR YIMYIM YIMOBILEM (EDITORIAL)

DIMAPUR

ROGONÜ

AAMI 14, 2024

Doctor azüngtsü purtem

Taküm 2024 küm medical doctor züngnertem asoshi agütsüba National Eligibility cum Entrance Test (NEET) nung meshitaki inyakba mapatem anema supreme court tashi nung ken o benoktsüsa akümba aibelenbatemji tatidang agütsürtem ajak asoshi tezüdangtsü takoksa mapa ka lir. Akhidangbo, government teyari agia medical doctor züngnertem asoshi pei pei state government-i dang tatidang agir pei pei anguba mark yari college balalai yok. Ajisüaka, iba tatidang ya ajak asoshi kasasa aser tajungba agitsü nükjidadong nung 2016 küm nungi center government-i India ajunga nung kasa tatidang ya ajak atema khen nung dang agitsü telemtetba agiba agi, NTA ajanga NEET ya agia arur. Atangji, India ajunga nung medical züngnertem asoshi külemi dang kasa NEET tatidang agütsüaka, akhi ama asenok teküpbok jenjang nung alir kin tilatem Scheduled Caste, Scheduled Tribe aser OBC purem asoshiibo shilem balaka shiteta yutsür, anungji, tashitsü agi, tangar kin tulu aser tajakleni aoba kintem asoshi takok jenjang mark 500 nung latettsü dang asenok teküpbok jenjang nung alir kintem asoshiibo takok jenjangji mark 300 nung latettsütsü. Iba jagi asenok ama yashiang shisa tenük lapoka kaketshisatsü bushirtemia linük nung medical college tajung nung züngtetter. Ajisüaka, taküm 2024 küm NEET tatidang nung atalokba ama ochimashi inyakyim ajanga tatidang agütsüba agi aiben tajungpurtemi tamajunger memeneper, kechiyong tatidang agütsüba tesem kar nungbo ajizüka züludaktsür, kar nungbo kiburi masü tangar nem züludaktsür aser tesem kar nungbo tatidang ketdangsertemi dena yaritepa langzüksür. Aji oda, taküma tatidang agütsüba tesem trok tashi nung tatidang agütsür 1500 shii parnok nem tatidang agütsütsü atema mapang peria magütsüba ken o benokba agi, parnok ken o ji obendangdak benoka jembir parnok nemji parnoki melazüngi toktsüba nungi angati mark (grace marks) agütsütsü obendang agütsüba amai grace markji agütsü. Ibaji dang masü tatidang agütsüba tesem kar nungbo kibur melena tangar nem tatidang agütsüdaktsüba putetba osanga liasü. Iba amaji NEET tatidang agütsüba maparen nung tai pur mepuma alidang 2024 NEET result adokdang tatidang agütsürtem rongnung karbo mark ajak agi 720 nungi 718, 719 aser 720 tashia ngua liasü. Atangji, techirartemi yamajia angutsü saka temulung malem tulu adokbaji item mark teimtiba angurtemji tatidang agütsüba tesem aser takdang kasa nung amenertem liasü. Ano result-ji nisung ajaki kangabo temulung agüja mereprangtsüsa election result adokba anogo nungang adoktsü. Iba jagi balaka temulung malem kaketshirtemi aser opposition teloki dena iba tatidang result dak aketba ken oji bushisüngdangtsü atema takangba sashia agütsüogo. Iba ken o ya ano okadak tepdaka lir saka tang NEET nung tarak maket takok ngua alirtem asoshiibo tazüngdaki aotsü atema asüngdangya tenzüksü temelaba agütsüogo aser grace mark angur kaketshir 1563 asoshiibo tatidang agütsüshiner atemabo agütsüshitsü NTA tebilemba lira ser ano meshitak purtembo pei aibelen yari kar küm ka, kar küm ana aser kar küm asem ta NEET tatidang magütsütettsüsa temerenshi latetja lir. Küm shia iba NEET tatidang ya linük nung kaketshirtem rongnung medical züngner lakh 23 dak temai agütsür aser item rongnung nisung meyirijang 70 dang shimtettsü, tetezü NEET tatidang agütsür noklang shia nisung aseme dang medical züngtettsü. Iba ama tatidang tesashi ka agütsütsü atema kaketshirtem küm aika amuia junga mao merangtepdang, karbo melamelaa ajizüka züludaktsütsü, karbo tangar nem züludaktsütsü aser kar nembo jelia tasüngdangbatem ayoktsü ta südaktsüra, NTA inyakyim kong agitsü ? Aji oda, tangari zülutsüba, ajizüka züluba aser sen agi jelia tasüngdangbatem alia NEET nung takok ngur medical doctor akümer jagi shiranger anepalua aneptsütetdima ? Ibaji auyaba sen agi police mapa alia police aküm amai dang asütsü ! Iba amai mataloktsü atema NTA inyakyim akangshitsüla. Aji oda, tatidang agiba takdang ajak nung webcam enoker NTA-i repranga lia tatidanga agitettsü aser JEE, NEET ama tatidang agütsütsü purtem renemtsüba Coaching center-tem yaa maliang tajungba asütsü.

OLEMSABANG

Tetsür mapa inyaker tem anema alitsü atema

Source Internet

Mapa inyaker tetsürtemi mapang timbaka pei kibong nüngdak, tanurtem reprangba, senden amenba aser ainlen senzüba densema mapa tapu balala aika inyaker. Mapa inyaker tetsürtemi nutrition aketba chiyungtsü tebur dang nungi balaka nüngdaker. Anungji temang anema alitsü asoshi chiyungtsü tajung achitsüji kanga tongtibang.

WHO ajanga bushisüngdangba ka ajanga ashiba agi, nisung billion 1.62 jungnüa anemia agi shiranger aser timba ka tetsürtem aser tanurtem lir.

Anungji temang anema lia pei mapa inyakettsü asoshi temang anepalutsüji kanga tongtibang.

Temang anema alitsü chiyungtsü kar:

Spinach: Iba chiyungtsü nung antioxidants, vitamins aser dietary fibres peria aliba ajanga anemia anema rarater. Ano broccoli, spinach aser lettuce amala süngoliotemji antioxidants lir aser Vitamin C keta lir. Item chiyungtsü ajanga temang touzük azüokba dang masü saka toxins den junga rarater aser tashitak aika nungi jenbudaktsür.

Entsü: Protein aketba chiyungtsü tajung rongnung entsü lir. Entsü temesüng nung riboflavin mesüra Vitamin B2 lir, aser ibaji ajanga temang cell junga mapa inyakdaktsüba den külemi tashi agütsür.

Nuts: Temang aser temulungjang naprong anema alitsü asoshi nuts nung nüngdakba nutrients, vitamins, minerals, temo aketba acids aser dietary fibres lir. Anogoshia tekabu ka sünga nuts achiba ajanga cancer aser temulungjang tashitaktem nungi jenbua alitsü.

Temo aketba ang: Hopta nung khen Salmon, trout aser mackerel ang temelang ka achiba ajanga anemia nungi taneptsü angutsü.

Tzü: Tzü peria ajemtsüla. Tashitak balala nungi jenbua alistü asoshi anogo shia tzü marok 8 bosa ajemtsüla.

Conjunctivitis indang temetettsü

'Conjunctivitis' ta ajaba tenük wara ya virus, bacteria, shampoo, anak-aoyi aser mokozü amala ajanga adokdaktsür aser iba wara ya nisung ka dak nungi ka dak mela-mela menateper.

Conjunctivitis temaitsütem: Tenük awakba, tenük merema akümba, nüktsü aser nükscü tali aluba, tenük mesakba aser tenüki junga mengui akümba nunger lir.

Bacteria: Sexually Transmitted Disease (STIs) densema bacteria ajanga conjunctivitis agi timtebaji tenük nung jenokba antibiotic tzü, anüba mozü mesüra mozü süngjang chia anepalutsüla. Doctor tetuyuba nung item antibiotic mozü shitak amshia anepalura hopta ka tsüngda jungadoktsü.

Virus: Yimra atongba virus ajanga conjunctivitis agia timtemdaktsür aser iba iba mesen yagi anogo pezü nü nungi tenetnü tashi timtemdaktsür.

Irritants: Shampoo, mokozü aser anak-aoyi amalai conjunctivitis adokdaktsübaji tzü temerük agi minute pongu shi tenük jungjanga shidoktsüla. Tenük shidokba sülen ghonda pezü tsüngdabo jungadoktsü. Acid mesüra alkaline amala ajanga conjunctivitis agi timtemertemi tekaraba nung doctor ajurutsüla.

Allergies: Allergy den sentakba conjunctivitis-ji allergy anepaluba mesüra allergen intokba sülenbo jungadoktsü. Allergy dak sentakba conjunctivitis timtim asoshia doctor ajurutsüla.

Pei kidang koma anepalutettsü: Tenük junga maküm tashi contact lens agizüksüla, junger sülen-a lens tejenji mamshitsüla, mozü meteter den asüngdangtepa eye drops amshiba den külemi, antibiotic amshitsüla, metsü adenba tzü nung meti metener nükscü tanemi shitoktsüla, nü teka mapang shia shitoktsüla.

Source - Internet

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Southern Baptists nung tetsür pastor tem anema vote agütsütep



June 11, 2024 nü Indianapolis nung Southern Baptist Convention senden nung adenertem tekülem sentong agidang tangokba noksa nung angur.

Indianapolis, Aami/June 13 (Agencies): Southern Baptists Convention nung tetsür pastor aliba Arogotem nokdangtsü atema Bodhbarnü (June 12) vote agütsütep, ajisüaka magizük.

Tetsür pastor aliba Arogotem nokdangtsü atema votes ji asemsü nungi anasü (two-third) nüngdaker ajisüaka iba bangzüng pusema vote 61 dang agüja liasü.

Ajisüaka Southern Baptist Convention-i sangdong ka ajanga, pastor ji teburtem dang asütsü tangatetba nungi matsüngshir, ta metetdaksü.

United States nung Protestant denomination tulutiba SBC nung tesüiba küm ishika iba onük nung o toktepa aruba sülen Indianapolis nung anogo ananü SBC senden nung vote agütsütep saka magizük. Kasa senden nung Southern Baptists-i Tir tasen ka shimba den külemi kibongtem dang vitro fertilization masütsü

tekümdangtsü metetdaksü.

2000 küm SBC-i pastor asütsü atema teburtem dang temsüa lir, ta sangdonga liasü. Ajisüaka iba tangatetba kübok tongti pastor ji tebur süra tetsürtem associate pastor asübabo kecha masü ta aikati bilemer.

Tetsür pastor anemertemibo tetsür pastor aliba Arogotem agientsü atema SBC dak tashi lir, ta ashir, ajisüaka item ama Arogotem agien nungbo talisa Black Southern Baptist Arogotem aika jendoktsüsa akümtsü.

Vote agütsüteptsü jakdang o entepba mapang Louisville nung aliba Immanuel Baptist Arogo nung pastor, Ryan Fullerton-i, "Iba ya Arogotem nung tetsürtemi pei sempet amshiba nokdangtsü atema masü. Ajisüaka Laishiba ajanga, pastor inyaksüji teburtem atema dang lir, ta jangja-jangja ashir," ta metetdakja liasü.

Virginia nung aliba Arlington Baptist Church nung pastor Mike Law-i, SBC nung tetsür pastor 1,800 shi lir, ajisüaka Lai tekong balala ajanga pastor ji teburtem dang asütsüla ta ashir, ta metetdaksü.

Paisa, "Asen sobaliba nung iba tenokdangba ya tesashi ta bilemstsü akok, ajisüaka asen Tsüngtem kanga shisa taka aser iba o ya tetsür-tebur ajak tejakleni aotsü atema lir," ta ashi.

"Iba ozüng yanglushitsü benokba ya ministry nung tetsürtem atema masü saka tetsürtemi pastor inyakba atema lir" ta paisa ashi.

Southern Baptist Convention nung Tir tasenbaji Charlotte nung aliba Hickory Grove Baptist Church nung tongti pastor, Clint Pressley asütsü. Pai vote shilem 56 nguteta liasü aser

Tennessee nung pastor Dan Spencer-i vote shilem 44 nguteta liasü.

Odisha nung sorkar tasenba tentetba ajanga Khristantem shisabulur

June 12, 2024: India kübok Odisha state nung tawa assembly election nung BJP-i takok ngua sorkar akümba ajanga Khristantem kanga shisabulur, ta osang ka ajanga metetdaksü.

Küm 15 tejaklen Odisha nung Khristantem anema raraba mapang nung Khristan 100 dak tema tepset aser ki aika rongdokja liasü.

Tawa Odisha state elections nung tesüiba küm 24 shi yimsüsüba secular party Biju Janata Dal (BJD) madak BJP-i takok ngua liasü.

Assembly menden 147 aliba state nung BJP-i menden 78 nung takok angu aser Lok Sabha election nunga BJP-i state nung menden 21 nungi menden 20 nung takok nguogo.

June 12 nü Mohan Majhi-i chief minister tenangzükbaga agiogo. Arrshi küm 52 Majhi ya Hindu group telok RSS indang

school ka nung tamalen tesayur inyaka liasü.

Odisha yimtiba, Bhubaneswar nung aliba Cuttack-Bhubaneswar Archdiocese nung putir, Ajay Singh-i, "Sorkar melenba ya onok Khristantem atema tebilemstsü onük ka lir, kechiyong 2008 küm Kandhamal nung tatalokba onoki tang tashi mamateter," ta ashi.

Tang mezüng BJP-i parnok kijai menden peria nguteta Odishia nung sorkar akümer.

Chief minister tasenba Majhi ya Keonjhar (tangbo Kendujhar) district nung tribal lenir la lir. Iba tesem ya 1999 küm Australia nung missionary Graham Staines den par jabaso ana gari nung mi agi rongseta südaktsüba tesem lir.

June 12 nü osangbener den jembidang Khristan putir Singh-i, "Sorkar tasenbai koma yimsü

südir onoki reparanga atatsü, kechiyong party ka mesüra parnok densema aliba teloki tamalen inyakba nung ajemdaker sorkar tasenba onoki asadangtsü makok," ta ashi.

Paisa, "Parliament nung sorkar akümtsüsa BJP-i menden 272 mengutetba atema onok melung süngzüker. Parnoki majority mengutetbaji election nübuyimba mapang nung parnok minorities anema jembiba agi lir. Odisha nung sorkar tasenbai iba nungjagi tangazükba angutsü aser ajak kasa züngshitsü imlar," ta ashi.

Arogo nung lenir kati, "State nung sorkar tasen melenogo, anungji Khristantemi mission mapa inyakdang kanga kümdangtsü nüngdaker," ta ashi.

Nütsüng million 42 aliba Odisha nung nütsüng shilem 2.77 dang Khristantem lir.

ANOGO ABEN TSÜNGREM DEN

Shisatsü metentsür

SAKA SHISATSÜJI LAR CHIRTEM AJAKI METENTSÜR LUKE 7:35

Alimaji techirartetmi sünga lir. Ajaklen parnok tebilemba shisatsü agi na mesüktsü merangertem lir. Saka Tsüngremi ashir, shiri pei tebilemba tashi ayimoktsür pa/la ji shisa takatiba masü, saka shibai mapang nung tim telemtetba agir pa/laji shisa takatiba.

O langtepbba mesüra toktepbba ajanga shisatsü kuliji magütsür. Mapang nung dang shisatsüji sayur. Kari tekong meranga parnok tebilembaji tajungtiba ta sangdonger. Shirnoki parnok tebilembajisa tajungtiba akhanger aji mezüngshi parnok shisatsü bendanger tajungtibaji mapang lir. Ola tulu agi ayimtenba jagi masü mapang jagi shisatsüji kuli asür.

Kodang Tsüngremi ne dang langka inyaksü ashir karibo ne shisatsü aser mapaji magizükteti anema apusotsü. Idangji ne telangzübaji ne sasa temeten ashitsü bilemstsü akok. Aji saka, nai aremzüka atara ne mapa nai metenja jembiba dang nungi tajungba mapang nung ne shisatsü jungkai adoktsü.

Putu ajak nung, Tsüngrem nungi anguba shisatsü tindang aser shidak ta kuli süa aru. Nai angashiba ajak Tsüngrem O anema bendangtsübaji lendong lir. Tesayuba balala adoktsü aser süitema aotsü saka Tsüngrem O tatem makai alitsü. Kodangsa nai kar nem tsüngi o agütsüdir, ne tebilemba tajungtiba nungi masü, Tsüngrem O nungi tejangja metetta agüjang. Nai Tsüngremi mulungba shimteta ali tashi, mapangji ne pukümer alitsü. Mapang nungji nai ne tai putetra, Tsüngrem dang tatok meshir Laishiba ajanga Tsüngrem nungi o tasen bushiang. Iba o nung tashi angang aser ne taküm nung Tsüngremi Pa shisatsü aka jangjashidaktsüba ajia liang.

US nung Khristantemi alima nung yimsü temeden atema sarasademtsü

June 13, 2024: United State nung Catholic putirtemi alima tesem ajaklen yimsü temeden atema hopta piyong sarasadem nung shilem agitsü atema Khristantem ayongzükgogo.

June 22 nungi tenzüka June 29 tashi Religious Freedom Week amongba mapang nung sarasademtsü atema putirtemi onük balala lemsatepogo; item onük rongnung, Tenla kitem raksatsüba anentsü, Pakistan nung

Tsüngrem mezüngmeshiba ozüng kübok timtemba Khristantem aser India nung reshikangshiba Khristantem atema sarasademtsü lir.

June 22 nü sarasadem onükji- US nung temeshi tesemtem nung tamangertem sadoksadoka adenshir tekülem agitetsü atema sarasademtsü.

June 23 anogo nung Tsüngrem mezüngmeshiba ozüngtem kübok reshikangshi tsübuba Khristantem atema sarasademtsü.

Nigeria, Pakistan, Iran, Afghanistan, Somalia,

Mauritania aser Saudi Arabia densema linük shilem 40 nungbo tang tashi Tsüngrem mezüngmeshiba ozüngtem lir, aser item ozüng kübok tasüba temerenshi densema temerenshi tulu balala agütsür. June 24 nü Khrista osangtajung kulisütsü atema tanela temeshi ajanga Khristantem nem tasütait tanela agüjang ta sarasademtsü.

June 26 nü India nung reshikangshiba Khristantem atema sarasademtsütsü. India nung Hindu telok balalai Tenla kitem raksatsüba, tekülem sentong tagidak mapang timtem agütsüba aser Khristantem dak azükba tatalokbatem kanga bulua kümogogo.

US nung putirtemi Catholic Near East Welfare Association (CNEWA) mapatongtem maneni inyaker. Middle East, Northeast Africa, India aser Eastern Europe nung akhidang Eastern Arogotem yaritsü atema 1926 küm Pope Pius XI-i CNEWA ya tenteta liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sütök

(v) Ku mejeptok, ongtok (hair cut, shave off)
* Limabai tejashi sayua ku ajak sütök.

Sütöksünem

(adj) pelatepa mapang endoka senzüba (stroll,relaxing)
* Kaketshirtem sodi mapang sütöksünema ayongi ao.

OLONG PAITEP # 6817

1			2			3			4
			5		6		7		
			8						
	9								
									10
			11				12		
13						14			

TIPLÉN

- 1. Jenjang tulu - (5)
- 3. Nisung sür amongba - (5)
- 5. Shisadang - (5)
- 9. Kilung nung temalen - (9)
- 11. Temulung tata - (5)
- 13. Puti o jembirtem - (5)
- 14. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ ung - (3)
- 4. Ali tasazük - (6)
- 6. Anema apusoba - (7)
- 7. Tebang nung enoker achi - (5)
- 8. Küm ka nung asortem - (5)
- 9. Tetsüng tsünglanglen - (6)
- 10. Atenshiba / Washi - (4)
- 12. Sü atakdang amshiba oset - (3)

OLONG PAITEP # 6816 TELANGZÜBA

TIPLÉN:

- 2. Tsükten, 4. Asung, 5. Taku,
- 7. Atalok, 10. Lempet, 13. Apir,
- 14. Lanur, 15. Tenütsü.

LANGTSÜNGLEN:

- 1. Atala, 2. Tzüla, 3. Apuso,
- 5. Tenem, 8. Lajar, 9. Opan,
- 11. Penzü, 12. Tarak

NAI-A YA METETTER MA



Süngo (tea) ya 2737 BC nung China nung chuba kati ajungbena ngutet ta otsüi ashir. Tzü molua aliba chipo ka nung süngo tou ishika ponger aruagi tsükba sülen süngo ya tejangja ngutet. Tesülen, 1908 küm nungi tenzüka New York nung alir Thomas Sullivan-i süngo ya yangko nung sepa ayoktsü tenzü.

**Khandu term 3buba Arunachal CM
mapa inyaktsü tenangzüktepba agiogo**



Itanagar, Aami/June 13 (Agencies): Pema Khandu term asembuba atonga Arunachal Pradesh chief minister mapa inyaktsü atema DK State Convention Centre, Itanagar nung Brehostibarnü tenangzüktepba agiogo.

Pa dak alia Bhartiya Janata Party nungi Chowna Mein term anabuba atema deputy chief minister mapa inyaktsü tenangzüktepba agiogo.

Arunachal Pradesh Angh KT Parnaik-i achaayanga tenangzüktepba sentong ya agiogo.

Union Home Minister Amit Shah, JP Nadda, Kiren Rijiju, Assam Chief Minister Himanta Biswa Sarma aser tanga ketdangsürtem matsüngda minister terka tenangzüktepba agia liasü.

Tanga minister tem rongnung Biyuram Wahge,

Nyato Dukam, Gabriel Denwang Wangsu, Wangki Lowang, Pasang Dorjee Sona, Mama Natung, Dasanglu Pul, Balo Raja, Kento Jini, aser Ojing Tasing nung densema lir aser parnok ajak tenangzüktepba agiogo.

Arunachal CM ya Bodhbarnü BJP legislature party lenir asütsü shimshia liasü aser iba ajanga pa CM ama tenangzüktepba agitsü asoshi lenmang lapoktsüogo.

Iba sülen Arunachal Pradesh Angh lieutenant general KT Parnaik-i (ret) sorkar kümtettsü atema Khandu jaoka liasü.

Khandu mezüng 2016 küm Arunachal Pradesh chief minister aküm. Pa 2019 küm May 29 nü BJP lenir ama tanabenbuba CM mapa inyaktsü asoshi tenangzüktepba agia liasü. Iba küm parnoki

assembly election nung menden 60 nungi 41 koka liasü.

Tawa tembangba Arunachal Pradesh assembly election nung BJP puri menden 60 nungi 46 akok aser parnokisa Lok Sabha election dena koka liasü.

Party-i, menden 10 bo tetokteper makai koka liasü.

NPP ya Centre nung NDA sorkar kübok shilem ka lir aser parnoki menden pongu koka liasü. NCP-i menden 3, PPA-i menden 2 aser Congress-i 1 menden ka koka liasü. Tanungba mendentem ya independent candidate temi koka liasü.

Tenangzüktepba magi tsüngda Khandu-i X ajanga, "kin, tamangba yimsü aser nüburtem ajak anisema state terenlok asoshi onok bendanga agütsür lir," ta ashi.

Assam: Temple ka nung auyaba atema nisung 4 apu

Guwahati, Aami/June 13 (Agencies): Assam nung Kokrajhar district kübok Mahamaya Temple rakpoka tua auyba dak sendakba nung Assam police nisung pezü puogo, aser parnok ket nungi temple nungi auyaba oset densema auyaba oset tanga aika ngutetogo.

Kuli balala dak ajemdaker police temi bushisüngdanga ao aser Brehostibar anepdang nisung pezü puogo. Ken o ashishiba sülen police

temi parnoki auyar aliba osettem nguteta liasü, ta Assam Director General of Police (DGP), Gyanendra Pratap Singh-i ashi.

Police temi Mahamaya aser tanga deities temi asema taribe agi yangluba "mukuts" (korang) asem, gram 15 shi hon telong ana, temple nungi auyaba asütsü ta temulung melemi bilemba ornaments aser taribe agi yangluba oset balala, yongminyün agi yangluba auso ka, sen 45,000, mobile phone

handsets pongu, auyadang amshiba asütsü ta bilemba gas aser iron cutter tem aser Assam o West Bengal na arrtsü nung temple balala nung auyaya senzüba mapa amshiba asütsü ta bilemba Swift Dzire gari ka ngutetogo, ta DGP Singh-i ashi.

Auertem ya Mandal Ali, Sarif Uddin, Hazrat Ali aser Asraful Ali ta jangjaogo aser parnok ajak ya Assam nung Dhubri district kübok Bilasipara nung alir ta jangjaogo, ta DGP-isa metetdaksü.

Sikkim: Mangan nung anentsüh alu; nisung 1 asü

Gangtok, Aami/June 13 (Agencies): Tzünglu kanga sashia aruba sülen Sikkim kübok Mangan district nung anentsüh agi kongshia nisung ka süogo aser nisung pongu samara bushidar.

District kübok tesem balala nung anentsüh aluba ajanga lenmangtem nokdangogo aser ki raksaba den electricity intongtem raksatsüogo.

Mangan district kübok Pakshep tesem nung nisung ka tasü mang ngutetogo aser Rangrang anasa Ambithang nungi nisung asem aser Pakshep nungi ana samar bushia aliba metetdaksüogo.

Anentsüh agi ki aika kanga mejungi raksatsüogo. Geythang

nung anentsüh agi ki asem dak kongshio aser Pentok anasa Nampathang nunga ki aser lenmangtem aika raksatsüogo.

Anentsüh agi kongshitsü ana nung aliba ajanga Bringbong police outpost tanga tesem kati belenerogo aser Sankalan nung apu ka tamendakdak raksatsüogo. North Sikkim nung mobile network services mejungi kümer lir.

Iba dak sendakba nung district administration-i, State Disaster Response Force (SDRF) dang tenüngdakba oset balala bener Mangan-i team ka yoktsü mepeshia metetdaksüogo.

Anentsü merektettsü merangdar aser Mangshila Degree College anasa lenmang

merektettsü atema earthmover ka yoka lir.

Sikkim chief minister Prem Singh Tamang-Golay, shiba tang BJP leader Pema Khandu tenangzüktepba agiba sentong nung adentsü atema Arunachal Pradesh nung oa lir, pai district ketdangsürtem, police aser department tekolaktem den tongtepratepa arudar.

"Lendong nung asürtem aser lendong agi kongshir aliba kibongtem nem takokba tashi teyari agütsütsü merangdar, kong parnok khen atema jenoka lidaktsütsü atema tesem anepalutsüba aser tenüngdakba chiyongtsü aser osettem agütsüba densema lir," ta Sikkim CM PS Tamang-Golay-i ashi.

Asylum ozüing sülen manidakba yong Hungary dang senchi achi

Luxembourg, Aami/June 13 (Agencies): European Union indang asylum laws zülen manidakba aser ozüing alema migrants tem pei limai meyipa yokba mechi European Union indang court ajanga Hungary dang senchi sen 200 million euro (\$216m) achi aser anogoshi sen 1 million euros (\$1.08m) achitsü temerenshi agütsü.

2015 küm nungi refugee aser asylum bushir million ka dak tema Europe-i aitba sülen Hungary indang anti-immigrant sorkari par linüki aiter anema ajang-ajanga nokdak. Asylum bushirtem aser migrants tem ya timba Syria nung rara adokba mechi jena arurtem lir. Parnoki arütsü nung atsü atsüdang aser nisung aika tashiyim amshia nokdang.

Brehostibarnü obendang agütsüba nung European Court of Justice ajanga ashiba agi, 'third-country' senso ozüing agi memelai arua alirtem meindokba aser parnok indang

application magizükba asoshi mepishia ken o benokba nung tatem telemetba ka magütsü 2020 obendang sülen Hungary-i manidaktet.

"Iba tamakok nung metetsümonga arok EU policy indang application magizükba dena lir, koba EU law nung kanga mejungi aibelenba lir," ta Brehostibarnü ECJ obendang nung shia liasü.

Sorkari taoba mapang 2020 obendang nung mangatetep lir, kechiaser parnok "transit zones" shibangogo aser tarutsü nung asylum bushirtem nokdangtsü ozüing tesashiba yanglur, ta shia liasü.

Tang Hungarian legislation kübok nüburtemi asylum atema linük arütsü alema maitdang kidanger Serbia mesüra Ukraine nung aliba embassy tem nung application agütsütsüla, ta shia lir. Arütsü alema aittsü merangertem mapang shia meyipa yoker.

Ato Kilonser Viktor Orban, shibai independence of

judiciary nungi Ukraine dangi nok-nü yoktsü onüktem nung EU den mapang shia mangatetep adoka arur, aser European court-i melenshitsu totuyuba agüjaka asylum bushirtem asoshi tang aliba ozüing amshitsu ta 2021 küm nangzuka liasü.

European Commission ajanga court nung 2022 küm tetenzüklen application tanabuba benoka 2020 obendang sülen anidaktsü atema Hungary-i nüngdakba mera kecha magir ta shia liasü.

EU ozüing nung züngsem linük ajaki asylum agütsütsü atema yimya kasa amshitsu shia lir.

EU ozüing nungya nüburtemi asylum atema asüngdangtsü temeden lirmesüra pei aliba linük nung kumzuka malitsu tsüborä mesüra pei kin, tamangba yimsü, atsü-apong mesüra danga maparen dak ajemdaker reshikangshitsu ama lira international protection bushitsu temeden lir.

WT.MAONGKALA & REV.A.TEMJEN AO ASÜBA ANOGO BILEMTETA AMUNGER



Temeim Ojala onok nungi pilar
Küm 25 ajungba anogo
Aser

Obalaa onok nungi pilar
Küm 10 ajungba anogo
Menungra Bilemteter
Asenok majurutep tashi
Nenaprongla temeim
Onok mulung nung teti alitsü.

~ CHIRNUR, SEMCHIR & PUINERTEM.

Russia indang tzüyim sepaitem Cuba tongogo

Havana, Aami/June 13 (Agencies): Russia indang Admiral Gorshkov frigate aser nuclear-powered submarine Kazan den 'tug boat' ka aser totzü abenba rong ka anogo pongu atema Cuba tonga aruogo, koba Ukraine amakba mechi tensa mejungi kumer aliba mapang Moscow-i tashi sayur ama angateter.

Bodhbarnü item rong ya Havana zükum tonga arudang nisung aika adenshia repranga liasü.

Cuba ya mapang talangka nungi Russia tembar lir, aser tzüyim sepaitem indang rong tem tonga aruba mapang 21-gun salute agüja liasü aser Russian diplomats temi Russia indang rong tala ayiptena liasü aser kar noksa tangoka liasü.

Parnok Cuba-i arudang len tom nung Atlantic Ocean nung Russia nung tzüyim sepaitem indang rong pezü ya "high-precision missile weapons" training agia liasü. Sumarine aser frigate nungya Zircon hypersonic missiles, Kalibr cruise missiles aser Onyx antiship missiles keta lir, ta Russian Ministry of Defence ajanga ashir.

United States aser Ukraine indang Western allies kari Kiyiv dang Russia linük telung nung parnok indang nok-nü amshia amaktsü melaba sülen Russian navy ya United States anasai arur, aser taoba mapang yamai kodanga meinyakdang.

Havana ya Florida state kübok Key West nungi kilometres 160 (miles 100) dang pilar lir, kong US ya naval air station ka lir.

Russia tzüyim sepaitemi semdangba ya Havana asoshi tembar linük tem nungi naval vessels temi semdangba yimya ka dang aser iba fleet nungya

nuclear nok-nü bena mali, ta Cuba-i taoba hopta shia liasü.

Bodhbarnü White House National Security Adviser Jake Sullivan-ia osangbener dang iba ama naval exercises ya yimya ka dang lir ta ashi.

"Asenoki iba amala ya taoba mapanga nguogo aser ano tarutsü nunga angutsü imlar, aser ni iba nükjidong tejangja mashitsu," ta Sullivan-ia ashi.

Russia-i Cuba nem missiles agütsüba kuli mali saka US saksalema alitsü ta pai ashi.

Moscow nung Cuba indang Foreign Minister Bruno Rodriguez aser Russian Foreign Minister Sergey Lavrov na senden amenba mapang Russian tzüyim sepaitem ya arur alitsü.

Iba senden nung Rodriguez-i "Russian arütsülen North Atlantic Treaty Organization [NATO] ulushia aruba ozü sorkari magizükter," ta shia liasü aser iba yagi tang Europe nung rara, talisa Moscow aser Kyiv tsüngta adok, ta ashi.

Paia iba rara tajunglen nungi tembangtsü asoshi asangsang nung solution bushitsu ayongzuka liasü.

Cold War mapang Cuba ya Soviet Union indang tongtipang tembar liasü aser Turkey nung US missile yokba mechi Moscow-i Cuba nung ballistic missiles yokba ajanga alima nung nuclear war tera agi metenzük.

Russia-i totzü agi anüngba nung yaritsü atema March ita Cuba nem Russia nung totsü 90,000 metric tonnes agüja liasü aser ano shini yangluba nungi tenzuka ki o jen, renewable energy aser tourism tashi project balala agi Havana yaritsü nangzuka liasü.

Russia nung June 17 tashi

alitsü imlar. US ketdangsur temi Russia nung rong ya region nung meyi piyong alitsü aser Venezuela nunga anentsü imlar.

Kasa mapang Russian ballistic missile ka Ukraine kübok Kryvui Rih tesem nung apartment building ka nung khaloktsüba lendong nung nisung toku asü aser tanur pongu densema nisung 29 yiru, ta Ukraine indang Interior Minister Ihor Klymenko-i ashi.

Klymenko-i iba osang ya lendong atalokba tesem nung recovery mapa tembangba sülen Bodhbar nikonkdang ashi.

"Anogoshi aser ghonda shia Russia nung kiralongra mapa ajanga tembar linüktem den lungjemer Ukraine indang air defences tashi itshitsüla ta kuli sayur," ta Ukraine Tir Volodymyr Zelenskyy-i iba lendong atalokba sülen ashi.

Ukraine south tsütsü Kryvui Rih ya Zelenskyy'er yimti lir.

Pai iba tesem nung tangokba video ka social media nung lemsatepba nunga rescue workers temi ki o jen raksar alidak takum alirtem bushia liasü aser Ukraine tembar linüktem dang Russia nung tayimtsü amshia amakba aridoktsü atema sophisticated air defence systems meshia liasü.

United States-i Ukraine nem ano Patriot missiles system yoktsü mulungba US ketdangsur anati Mongulbar aonung Washington nungi ashi. Brehostibarnü nungi tenzuka amenba Group of Seven (G7) senden nung Ukraine nem teyari agütsütsü indang ken o jembitsü.

Russia-i 2022 küm February ita nungi Ukraine amak metenzükdang Kryvui Rih nung nisung 635,000 shi liasü. Iba rara nung mapang shia iba yimti amaker.

GOVERNMENT OF NAGALAND DIRECTORATE OF YOUTH RESOURCES AND SPORTS NAGALAND : KOHIMA

NO. DYRS/SPORTS-C/34/2019: Kohima dated the __ June. 2024

CIRCULAR

In reference to the Department CIRCULAR dated 30th May 2024, this is to inform all the interested candidates for grassroot festival football (Baby League) to report in the I.G stadium for registration at 9:00 AM on 17th June 2024.

Sd/-
(KETHOSITUO SEKHOSE)
DIRECTOR

Pakistan-i taruba küm atema sen \$23 billion aputsü sentong lir

Islamabad, Aami/June 13 (Agencies): Terenlok sentong atema senotsü nüngdakba agütsütsü aser linük telungzük nung senotsü nüngdakba peritsü asoshi Pakistan-i taruba fiscal year atema tajemba agia sen \$23 billion aputsü sentong lir, aser yangji tang apua aliba sen \$12 billion menoktsü densema lir, anungji sen agi kanga anünga aliba linük indang foreign aser economic policy tem IMF ama alima nung financial institutions dak metaloka alitsü, ta osang ajanga ashi.

Sen USD 23 billion nungya sorkari budget document nung sen USD 20 billion inoka lir. Parnoki yangji United Arab Emirates (UAE) ajanga sen USD 3 billion agütsütsü aliba meinok, kechiaser ibai balance of payments support atema lir.

Budget financing aser foreign exchange reserves yangertem atema Pakistan-i sen USD 19 billion aputsü shia lir. Iba sen ya kanga aika lir, anungji Pakistan indang foreign aser economic policy tem IMF, World Bank, Saudi Arabia,

China, UAE aser Islamic Development Bank dak metaloka alitsüsa akumtsü.

Item linük dak metaloka aliba mechi tangbo item linük aser international sapang nung sen aputsü temi anishir.

Saudi Arabia aser UAE nungi sen USD 15 billion linük nung invest asütsü nangzuka lir, saka tang tashi item tenangzükba ya tezüngzüktep tejangja ka makum lir, ta Ato Kilonser Shehbaz Sharif-i ashi.

Foreign commercial bank tem nungi asendenshir sen maputetba yong sorkari maneni fiscal year tasen atema sen USD 3.9 billion jengang foreign commercial loans agitsü budget yanglua lir.

Ajisüaka takum küm atemdang China-i sen USD 1 billion commercial debt magütsü atemer.

Pakistan ya Saudi Arabia, China aser UAE linüktem dang sen jenti apua lir aser itemji menoktsü mapang tonga arur.

Sorkari ano Islamic Development Bank nungia sen USD 500 million shi aputsü sentong lir.

Australia Open: Prannoy quarterfinals-i iogo



Aami/June 13, 2024

(Agencies): India nunger badminton asayar tejen, HS Prannoy-i Brehostibarnü Australia Open tebur kija asaya tanabuba round nung Israel nunger asayar Misha Zilberman koka quarterfinals-i iogo.

Prannoy, shiba taoba mapang world No.1 asayr ka aser iba asayamung nung fifth seed asayar lir, pai iba asaya nung Zilberman 21-17 21-15 agi koka liasü.

Pa quarter nung Japan nunger second seed asayar

Kodai Naroaka den asayatsü.

Ajisüaka India nunger asayartem rongnungi Kiran George bo Japan nunger asayar Kenta Nishimoto-i 20-22 6-21 agi tsükdaktsüogo.

India tsürtem rongnung eight seed Aakarshi Kashyap-i, Australia tsür Kai Qi Bernice Teoh 21-16 21-13 agi koka quarterfinals-i iogo, kong la third seed Chinese Taipei tsür Yu Po Pai den asayatsü.

Ajisüaka tetsür kija asaya nung Anupama Upadhyaya aser Malvika Bansod nabo

tsükatokogo.

Anupama, sixth seed Indonesia tsür Putri Kusuma Wardani-i 11-21 18-21 agi tsükdaktsü aser Malvika Indonesia tsürsa Ester Nurumi Tri Wardoyo-i 17-21 21-23 agi koka liasü.

Tetsür tarep asaya nung Rutaparna aser Swetaparna nata tsükogo. India tsür la ana ya Malaysia tsür Pei Jing Lai aser Chiew Sien Lim nati 5-21 9-21 agi ayong ayonga koka liasü.

Tarep temeyoktep asaya nung B Sumeeth Reddy aser N Sikki Reddy nati Australia nunger tarep Kai Chen Teoh aser Kai Qi Bernice Teoh na 21-11 21-11 agi koka quarterfinal-i iogo.

Ajisüaka tena quarterfinals nung tena top seed China nunger tarep Zhen Bang Jiang aser Ya Xin Wei na den asayatsü, lir anungji asaya akoktsü kanga melarabo masütsü.

Nadal aser Alcaraz na Spain nungi Olympics asayatsü



Aami/June 13, 2024

(Agencies): Paris Olympics matong tsüingda Spanish tennis federation-i sangdong ka ajanga, French Open champion Carlos Alcaraz aser Grand Slam 22 koker aliba asayar Rafael Nadal na tebur tarep asaya nung linük tenüing nungi asayatsü ta metetdaktsüogo.

Arishi küm 38 tain Nadal aser arishi küm 21 tain Alcaraz nati junga asayatetra tenati opponent tem mulung nung tetsübu aita daksütsü.

Alcaraz-i mezüingbuba Roland Garros title abenba sülen

anogo asem lir iba osang ya sangdongogo. Taküm French Open tebur kija asaya final nung pai Germany nunger asayar Alexander Zverev koka liasü, koba Olympics asayatsü aliba yimti nung asaya liasü.

French Open akokba densema Alcaraz-i tang agi tasembuba Grand Slam kokogo. Pai Wimbledon aser US Open dena koka lir. Pai Nadal ajateta hard court, grass aser clay ta court tapu asemprongla nung Grand Slama akokba asayar tanobusang kümogo.

Alcaraz yagi Spain nunger

rongnungi Nadal melenzüktsü ta jembia arudar aser paia, pa asaya Nadal-i kanga ajungmesoba mapangshia lemsatapa arudar.

Kasa mapang nung Nadal-i, Olympic tebur kija asaya nung 2008 küm gold medal nguogo aser 2016 küm Marc López den tarep asaya nunga gold medal ngua lir.

"Rafa aser Carlos na Paris nung külemi asayatsü," ta Spain captain David Ferrer-i squad sangdongba mapa ashi.

Nadal shiba asaya nungi anentsü mapang tonga arudar, pa kümtem tsüingda yiruba ajanga junga masayateti kümogo aser pa taküm tatensa asayatsü imlar.

Nadal-i otsüsütsa Roland Garros 14 ben koka lir, kong Paris 2024 tennis event asayatsü renema lir. Ajisüaka pai clay-court asayamungtem nung junga masayateti arudar aser taküma Court Philippe-Chartier nung mezüingbuba round nung pa Zverev-i tsükdakja liasü.

AC Milan coach mapa inyaktsü Paulo Fonseca shimogo

Aami/June 13, 2024

(Agencies): AC Milan coach mapa inyaktsü atema Paulo Fonseca Brehostibarnü shimogo aser Serie A champion aser city rival Inter Milan den tokteptsü atema team tajung ka tentettsü atema pa nem nongloktsüogo.

Fonseca-i, Stefano Pioli melenogo aser kümasem atema tenangzüktepba yangluogo. Stefano Pioli-i tawa tembangba season sülen club tokja liasü. Pa AC Milan nung küm pongu shi inyakogoo aser iba mapang 2022 küm Serie A title bena liasü.

Taoba Season Milan pur Serie A nung tanabuba jenjang nung tembanga liasü. Parnoki Inter point 19 agi memenep. September ita derby asayaba mapang Milan pur Inter-i goal 5-1 agi akok aser April ita tanabenbuba asayaba mapanga goal 2-1 agi koka liasü.

Küm tenet tashi Champions League nung masayai aruba sülen Pioli lenisüba nung Milan pur 2021 küm CL-i ai aser semifinal tonga asaya saka Inter-i tsükdaktsü.

Taküm Champions League nungbo Pioli-i aniba team runner-up Borussia Dortmund aser Paris Saint-Germain amala team tajungtem den ata liasü aser



tejakdangi metutet. Iba sülen Milan pur second-tier Europa League nung asaya saka quarterfinals nung Roma-i tsükdaktsü.

Kasa mapang nung Fonseca ya 2019-21 tashi Roma coach liasü. Portugal nunger manager ya tatensa Lille nung inyaka liasü. 2016 nungi 19 tashi Shakhtar Donetsk nung inyakba mapang pai kanga junga inyakba ajanga pa ajaki meteta aküm aser iba sülen Lille-i oa liasü.

Directorate of Youth Resource and Sport-i metetdaktsür

Dimapur, Aami/June 13 (TYO): May 30 nü Department sangdong dak ajemdaker, grassroot festival football (Baby League) nung shilem agitsü janrartem dang June 17 nü anepdang 9:00 ako nung tenüing züingoksemtsü atema I.G stadium-i arutsü Director Kethosituo Sekhose-i metetdaktsüogo.

Sesko-i RB Leipzig den tenangzüktepba yanglushiogo

Aami/June 13, 2024

(Agencies): Slovenia nunger striker Benjamin Sesko, shiba Premier League club tem aikati alizüktsü atema tejangraba sayua liasü, pai Bundesliga club RB Leipzig den tenangzüktepba yanglushiogo.

Arishi küm 21 tain asayar ya summer nung Arsenal-i aotsü atema jembishinüa aruogo, ajisüaka pai Leipzig metoktsütsü telemtetba agiogo. Pa alitsü atema Chelsea aser Manchester United nata tejangraba liasü ta angateter.

Slovenia nunger asaya ya 2023 küm RB Salzburg nungi

RB Leipzig nung oa aden aser küm pongu atema tenangzüktepba yanglua liasü, kong release clause £55m densema liasü.

Pa Germany nung mezüingbuba asayaba küm pai asaya 31 nung goal 14 idaktsüogo aser pa iba club nungi 2029 küm tashi asayatsü atema bendanga agütsüshio.

"RB Leipzig nung mezüingbuba küm kanga junga asayaogo aser ni idaki aruba atema pelar," ta pai ashi. "Team, club, yimti, fan ajak kü atema jangrademtsüka lir. Anungji tenangzüktepba atsülangshiba ya jenjang tapet ka agiba ama bilemer," ta Sesko-i ashi.



June 13 nü Assam Rifles-i ayongzüka Mon District kübok Wakching nung aliba lanurtem aser Assam Rifles sepaitem football asaya ka asayaogo.

BILEMDANGANG

"Anogoshia mapa tajung kakabosa inyaktsü merangang."